



<County: Yorkshire East Riding>

<Code: L1136>

<MS reference: Kingston-upon-Hall, Corporation Archives, Bench Book 2, fol. 164>

<Text: Enactment>

¶ It is ordeyned by ye avice of ye Maire Counsell & all y^e Comons of hull ye last day of septembr~ 3ere of kyng henr~ sext ye xiiij^e / that fro thense forward y^t ye Maire & y^e Bailles sall be chosen euery 3ere y^e morne after Mighelmes day And euery burges beyng present synguler~ by h^{is} self sall say his avice in secrete wyse no mo heryng bot two worthi burges chosen by ye Comons & y^e Comon Clerk And y^e Comon Clerk to be sworne to titill trewly euery mans voice to whome he has geven~ his eleccion@

¶ Also it is ordeyned ye same day by ye avice of ye Maire Counsell & all y^e Comons of hull that ye Chaumberlaynes y^t sall be chosen fro hense forward sall lay downe with-in~ viij days after thay be chosen or at ye same day ather of thaym xx li sterling~ vnto ye Chaumberlaynes next befor thaym And if thay faille at y^t day or at ye viij day after // who so failles .^[of] thaym sall pay v markes to fyne and to procede to a+newe eleccion@